

TAITUSI

1

2

3

CHAPTER 1

Oi au o Paula, na i Talatala ni Kalou kei na apositolo i Jisu Karisito, ena vuku ni nodra vakabauta na sa digitaki ira na Kalou, kei na vakatusa na i vakavuvuli dina ka vakalotu.

² Me vakanuinitaki na bula sega ni mudu o koya sa yalataka e liu na Kalou, o Koya sa sega ni lasu rawa ea qai vakatekivu e muri o vuravura.

³ Ia sa vakaraitaka ena Nona Vosa ena kena gauna ni sa vunautaki, ka'u sa lesi kina me'u ia me vaka na Nona Vosa na Kalou na noda i vakabula;

⁴ Vei Taitusi na luvequ dina, me vaka na vakabauta sa tu vei keda kecega: me sa nomu na loloma, na yalololoma, na vakacegu, mai Vua na Kalou o Tamada kei na Turaga o Jisu Karisito na noda i Vakabula.

⁵ Au a laivi iko mai Kiriti mo rawa ni vakadodonutaka na veika sa vo tiko, ka mo lesia na Qase era vakadonui ki na vei koro yadudua, me vaka ka'u a vakarota vei iko.

⁶ Kevaka e dua sa sega ni cala ka sa vakawati ga vakadua, a ra sa vakabauta o ira na luvena, ka sa sega ni beitaki vei ira na i valavala vakatani se na talaidredre.

⁷ Ni sa dodonu me sega ni cala na Qase, me vaka sa i Talatala ni Kalou, me kakua ni domoqa, me kakua ni daucudrucudru me kakua ni daugunu yaqona, me kakua ni dauveiba, me kakua ni daudomona na i lavo.

⁸ Ia me dauvakacegui ira na vulagi, me daulomani ira na tamata vinaka, me yalomatua, me yalododonu, me yalosavasava, me dau taura na yalona.

⁹ Taura matua na i vakavuvuli dina o sa vakatavulici kina, me rawa kina ni o vakarota na i vakavuvuli sa vinaka ka vunauci ira talega era sa vosa vakatani.

¹⁰ Ni ra sa lewe vuqa era sa i valavala vakatani, era dautalanoa walega ka dauveivakaisini, ka vakauasivi vei ira sa cilivi.

¹¹ Ka sa dodonu me vagalui na gusudra, ni ra sa vakacalai ira kece na lewe ni vale e so, ni ra sa vakatavulica na ka sa sega ni kilikili, ena vuku ni yau vakasisila.

¹² E dua vei ira, a nodra parofita, sa tukuna, "A nodra i tovo ga na kai Kiriti me ra daulasu, ka i tovo vakamanumanu, era sa daukana ka vucesa."

¹³ Sa dina na i tukutuku oqo. O koya oqo mo qai vunauci ira vakaukauwa me vinaka kina na nodra vakabauta.

¹⁴ Mera kakua ni nanuma na i tukuni walega vaka Jiu, se na nodra vei vakaro na tamata era sa lesu tani mai ena i vakavuvuli dina.

¹⁵ Sa savasava na ka kecega vei ira sa yalosavasava, ia vei ira sa dukadukali ka sega ni vakabauta sa sega na ka sa savasava, ia sa dukadukali na nodra lewa e loma kei na

nodra vakanananu.

¹⁶ Era tukuna ni ra kila na Kalou, ia ena nodra i valavala era sa cakitaka ni ra sa tamata vakasisila, ka talaidredre, ka sega ni yaga kina dua na cakacaka vinaka.

CHAPTER 2

Ia o iko, mo tukuna tiko na veika sa kilikili kei na i vakavuvuli dina:

² Me ra yalomamakutu o ira na qase, me ra yaloqaseqase, me ra dauyalomatua, me vinaka na nodra vakabauta, me ra daulomasoli, me ra dauvosota vakadede;

³ O ira talega na yalewa qase, me ra dau ia na i valavala sa kilikili kei ira e ra sa yalosavasava, me ra kakua ni dauveibeitaki vakailasu, me ra kakua ni daugunu yaqona me ra vakatavulica na ka vinaka “

⁴ Me ra tuberi ira na yalewa gone me ra lomani ira na watidra, ka me ra lomani ira talega na luvedra.

⁵ Me ra lomavuku, me ra lomasavasava, me ra dautiko vakadua mai nodratou, me ra dauyalovinaka, me ra dauvakamalumalumutaki ira vei ira na watidra me ra dautalairawarawa talega, me kakua kina ni vosavakacacataki na Vosa ni Kalou.

⁶ Vakarota talega vei ira na cauravou me ra yalomatua.

⁷ Ena ka kecega mo sa i vakarau, ena cakacaka vinaka; me kakua ni cala na nomu i vakavuvuli, mo yalomatua ka yalosavasava.

⁸ Na vosa vakadodonu ena sega ni lewai me ca, me rawa ni madua kina o koya e veisaqa, me kakua kina ni dua na ka ca me ra dusi iko kina.

⁹ Me ra talairawarawa vei ira na nodra Turaga o ira na tamata, me ra cakava na ka kecega sa vinaka vei ira, ka me ra kakua ni dauvosa lesu tale.

¹⁰ Ka me ra kakua sara ni daubutako, me ra vakatakilai ira ni ra sa lomadina, ka vinaka me ra vakaraitaka na i vakavuvuli dina ni Kalou na noda i Vakabula ena ka kecega.

¹¹ Ni sa rairai na loloma ni Kalou, o koya sa vuni bula vei ira kecega na tamata.

¹² A sa vakavulici keda, meda biuta na i valavala sa sega ni vakalotu kei na gagadre ca vakavuravura, meda ia na i valavala vakayalomatua, ka yalododonu, ka vakalotu ena vuravura oqo.

¹³ Ni da waraka na i nuinui bulabula kei na Nona rairai vakaiukuuku, na Kalou levu ka noda i vakabula o Jisu Karisito,

¹⁴ O koya sa soli Koya ena vukuda, me voli keda mai na bula i valavala ca kecega, me vakasavasavataki keda Vua meda Nona tamata talei, ka meda lomakatakata ena cakacaka vinaka.

¹⁵ A veika oqo mo vosataka ka vakarota ka vunautaka vakabibi sara. Me kakua ni dua me beci iko.

CHAPTER 3

Vakananumi ira me ra dautalairawarawa vei ira na i liuliu kei ira na Turaga, me ra dautalairawarawa, me ra vakarau tu me ia na i valavala kecega e vinaka.

² Me ra kakua ni vosavakacacataka e dua na tamata, me ra kakua ni dauveiba, me ra yalomalua me ra yalomalumumu sara vei ira kecega na tamata.

³ Nida a lialia e liu oi keda talega, eda a dautalaidredre, eda a dauvakacalai, eda a dauvakayacora na gagadre ca kei na marau vakalialia, e da a dauloma ca ka vuvu, e da a

bulataka na bula e vakasisila, e da sa dauveicati vakataki keda.

⁴ Ia ni sa rairai mai vei keda na tamata na yalovinaka kei na yalololoma ni Kalou na noda i Vakabula.

⁵ Sa qai vakabulai keda o Koya, sa sega ga ena vuku ni cakacaka dodonu e da sa kitaka, ena vuku ga ni Nona loloma, ena i silisili ni sucu tale, kei na veivakavoui ni Yalo Tabu,

⁶ O koya sa sovaraka vakalevu vei keda ena vuku i Jisu Karisito na noda i Vakabula.

⁷ Meda vakadonui kina ena Nona loloma walega, ka meda yaco meda i taukei ni bula sega mudu sa vakanuinitaki.

⁸ Sa dina na vosa, ka'u sa vinakata mo vakadinadinataka tikoga na ka oqo, me ra gumatua ni kitaka tiko na i valavala vinaka o ira era sa vakabauta na Kalou, sa vinaka na ka oqo, ka yaga vei ira na tamata.

⁹ Ia na ka lialia sa dauveiletitaki mo biuta ga, kei na i vola ni kawa, kei na veiba, kei na dauveiletitaka na Vunau; ni sa sega ni yaga oqo, ka sa ka walega.

¹⁰ A tamata sa dauvakavuvuli vakatani mo biuta ni sa vunauci mada e liu vakadua ka vakarua,

¹¹ Na tamata vaka oqori sa veivakacalai ka i valavala ca, ka beitaki koya vakataki koya.

¹² Ni'u sa talai Aritema vei iko, se o Tikiko, mo gumatua mo lako mai vei au ki Nikopoli, ni'u sa nanuma me'u na tikoga kina ena vula i liliwa.

¹³ Gumatua mo kauti Sina na Vu ni Vunau, kei Apolosa, ena nodrau i lakolako, ka me kakua na ka e yali vei rau.

¹⁴ Mera vakavulici talega na i Soqosoqo Lotu ena cakacaka vinaka, me rawa ni ra sotava kina na leqa tubu koso, de ra na qai sega ni yaco mera vuavuai.

¹⁵ O ira kecega sa tiko kei au era sa loloma tu yani vei iko. Au sa loloma vei ira e ra sa lomani keitou ena vuku ni vakabauta. Me nomudou kecega na loloma. Emeni.

For other languages please go to www.wordproject.org